

IANI DOVSÆ
NORDOVICIS.

AD SUPERIOREM COM-
MENTARIOLVM SVVM,

*Septem capitum succidanea pro no-
uissima Horatij editione.*

Adpendix.



ANTVERPIÆ,

Ex officina Christophori Plantini.

M. D. LXXXII.

I A N V S D O V S A ³

CHRISTOPH. PLANTINO

S V O . S . D .



Ic tu, inquis, Horatium conscri-
 billasti? Imò, si scias, quã ex fa-
 cili omnia, quàm ne molirione
 quidem minima altera hæc, Ve-
 nusinæ lippitudini expensa, col-
 lyriorû concinnatio constiterit nobis: nã tu
 curiositatis nostræ successum potius; quàm
 vel industriæ indolẽ, vel lucubratarû noctiũ
 patientiam admirere. Sum enim (vt te nosse
 arbitror) fugitantiôr laboris plus satis: & Li-
 psianum illud scitũ est credere; *Musas oblectan-*
dis ingenijs repertas, non cruciandis. Et verò nos ho-
 mulli quid sumus, aut quàm diu hæc curatu-
 ri? Clemẽter igitur, & placidè, hoc est, animi
 causa, laxãdi inquam potius, quàm laßlandi;
 & (quod de se quoque Aufonius prædicat)

Otium magis fouentes, quàm studentes gloriæ.

Quid agas, mi Plantine? eo ego Genio inge-
 nioque sum natus,

Mî studia vt, non me studijs submittere curem.
Adde, quæ altera nobis quasi natura cluit,
consuetudinem, quam corroborata iam atq.
adulta ætate

Cur mutem, causa hercle nihil, Plantine, videtur,

Et satis est, pigro si licet esse mihi:

Neq. ita veterioso tamen, vt ingeniolū hoc
nostrū incultu vnquā, aut sôcordia torpescere,
sitūve corrūpi, & quasi rubigine obdūci
patiamur. Quid? an Præcidaneorū nostrorū
prolubium oblitus? quæ quidem apud te superiore
Vere deposita, tua porrò comitate in
ora & manus hominum tandem, tandē, peruenire
vt possint, haud ego interpretes modò,
verū herculè & Catulli & Tibulli ipsius
Manes appellare te iam pridem, ac tantū nō
reflagitare videntur. Ea profectò Douſam
tuum, tum anno, tum horno, potius in libris,
quàm conchis legendis deditum fuisse, Editione
(vt spero) facilè peruincent sua: neq. ita
aut Vacunæ, aut Murciae sacris operatum, vt
non otij, (cuius & Cato reddendam operam
putat) potiozem apud te rationem constare
voluerit sibi. At quando ea quæso comparitura?
Scio equidem te non esse largiloquum

in.

in pollicendo, nec Vaniloquidos istos imitari: Quos cum censeas

Esse amicos, reperiuntur falsi falsimonij,

Factiosa lingua, ignava opera, sublesta fide.

Sed neq. parcipromum esse scio in repræsentando, quod receperis semel. Itaque sustento sedulo, Spe (quæ omnes res spissas facit) plusquam decumana subnixus. quæ quô eueniat deniq. in tua porro, mi Plantine, situm est manu.

Quanquam ego quid tricolor? scribenti litera venit,

Litera Plantini nomine scripta mei;

Affectam liquido modò quæ auspicio Editionem,

Esse, fidem faciat indiciumq; mihi.

Affectam dico? Imò verò ad umbilicum vsq; adductam propemodum.

Macte: atq; O mihi nuncij beati.

Quid quæris? mihi demò renatus

Nunc demum videor. Valete porro

Morosa ocius, hincq; vorsum Iberos,

Estrices animorum, abite cura.

Vosq; exercita corda habere suetæ

Ægrimonia, spes, metus, querelæ

Iam facebsite. Vt, ô dei, deaq;

Totus gestio, corq; mille onustum

Porto latijus lubentiusque!

*Mecum, cumq; animo meo sis inde
Versum illum ingenians Catullianum:*

Quid me lätius est, beatiusve?

Parua loquor: fingine aliquid felicius, aut Dis

Esse, Ioniq; pote ipsi equiparabilius?

Angebar enim intimis sensibus, quod in morbo operas tuas cubitare acceperam. Sed magna Hygeiæ ac Deo Sospitatori gratia, quibus tuorum incolumitas curæ.

Nimirum timuit nostras Libitina querelas,

Que par tam magnæ non erat invidia.

Nemini proinde nunc certum est supplicare, dum quidem operâ nobis comitas commodare non grauabitur tua. Quod ipse tum deniq. multò etiam impèsius persuasum habiturus sum mihi, si modò exemplaribus illis, quæ de Commentariolo nostro Horatiano reliqua etiamnum superant tibi, Succidaneam hæcce quasi Appendicem, sub prioris Editionis illius calcem adiectare porrò atq. adstruere, animum, mi Plantine, induxeris tuum. Quod tamen si mense adeò superiori per Lipsium interpretem, etiam per scriptas literas plenè ac planè nobis te ostendisti esse facturum, tamen in re ita negotiosa ac multiformi-

ti formi suspiciosi nescio quid timoris agnosco. Et ignoscas velim properationi huic nostræ, Sallustianum illud subinde ruminans tecum: *Animo cupienti nihil satis festinari*. Quid? *Saturnalia an, optimum dierum*, & quidē Lipsiana, præ foribus adesse non vides? Eô dico, ne nos libertate ista Decēbri, pro prisco Quiritiū iure, vsos atq. abusos mirere, ea obtrudēdo tibi,

Quæ sulphurato nolit emta ramento.

Vatiniū proxeneta fracturum.

Cur tamen ista damus, rogitas? ut, cara Minus si

Lecturo, auctoris ob meritum, fuerint:

At præli splendore tui, formisq; probentur;

Accedatq; meis à te apinis pretium.

Etenim, Plantine, quam sim φιλόκελος, non ignoras; quamq. rei primū literariæ in cōmune, tum verò ipse mihi priuatim quoque gaudeā, gratulerq. meritò hercule ac lubentissimè; iudiciū ac delectū istum, cum curiosa sanè felicitate coniūctum, politissimis operum tuorū Editionibus magis magisque abs te publicitus adhiberi quotidie.

Maſte animo, quem rarus habet (sic itur ad astra)

Maſte tuo Genio, propositiq; fide.

Etsi tua quidē sunt istiusmodi omnia. Qua-

re , si sapias , quantum potest , hariolationes
has nostras praelis commendabis tuis . Scis
me minimè esse blandum . Itaq . verborum
sat est , apud te præsertim , cui prisca illa ,

*Nudaq; Simplicitas in studio potius ,
Quàm phalera , & pictæ tectoria subdola lingæ ,
aut argutiolæ istæ , plusquàm Palatinæ , nu-
giuendonum nostratum , nihil solidi crepā-
tium . Aucto , nosq; amare pergito , per vi-
cturum ARCHITYPOGRAPHIÆ tuæ
Genium ,*

*Dinarumq; novem communia Sacra , rogatus .
Lugduno Batauorum .*

I A N I D O V S Æ N O R D O V I C I S S V C C I D A -

N E A A D N O V I S S I M A M

Horatij Editionem Appendix. In qua pleræque Auctoritates in superiore Commentariolo prætermiſſæ opportunè ſuis quæq. locis cōciliantur: nonnulla vſque adhuc intentata nunc primitùs in lucem protrahūtur: alia partim aut nebulosa declarantur, aut corriguntur luxata, aut pravè alioqui affecta medicinam præſentem accipiunt denique.

C A P V T I.



E N V I S & anguſta frōtis modū in honore fuiſſe antiquitus, Arnobiana quoq. ſuffragatione deſenſum. Eideſdem Chriſtianiſſimo Scriptori per cauſam auxilium latum. *Deos patrios* eodē planè cum Laribus ac Penatibus habendos. Eam in rem Dionyſio Halicarnaffæo teſtimo-

G 5

ſtimo.

stimonium denunciatum. *Omniscivitas*, tam,
hîc quàm in Prudentiociuitati Romanę resti-
tutum assertumque. Mos veteribus Poëtis sol-
lennis, ingeniorum monumenta vnà cū ima-
ginum sacrum forma dedicandi in Bibliothec-
is publicis. Homines rebus suis ac saluti dif-
fisos in exodio vitę caput operire solitos, etiam
Petronij exemplo confirmatum. Priori enar-
rationi nostrę super hoc versu : *Natales gratę
numeras* : ab auctoritate quoque Macrobianæ
fulcimentum quęsitum repertumque.

D O C V I suprà Commentarioli mei Capite II.
veteres Romanos illos sic habuisse, & ita in venu-
statis Legibus posuisse, *tenuem angustamq. id est,
breuem ac modicam frontem ad forma commenda-
tionem conducere inptinis*. Testes in eam rem, &
quidem superstites feci, certissimos hercule ac lo-
cupletissimos; haud Senecam, aut Petroniũ mo-
dò; sed verò & Martialem & Silium, Lucianum
deniq. quos auctoritatem neutiquam defugitu-
ros, persuasum est mihi, ad defensandum Hora-
tianum illud ex Odis scilicet:

Insignem tenui fronte Lycorida.

Item alterum ex Epistolarum lib. primo pro-
ductum: *Nigros angusta fronte capillos.*
contra nostrę sanè iuuentutis fastidia, & (quę
ratio maxima est) plusquàm basilicam Principis
viri

viri Edictionem, quacōmendatissima istæ *Augustæ Frontis tenuitas*, tantum nō in opprobrium versa ac dehonestamentum faciei. Sed hæc plus satis superq̃. (vti spero) coaceruatis vndiq̃. exemplorum struicibus redarguta, ac profligata oppidō. excepto, quod disertissimo Christiani generis vindici, Arnobio inquam, testimonium id temporis denunciare fuerim oblitus.

Qui tamen vxus

Pro centum poterat millibus esse mihi.

Neque id adeò iniuria. quippe acerrimus iuxta ac grauissimus sæculi sui castigator. quo, quamuis inualecente iam inde Christianismo, tantū abest, vt desita, vel abrogata fuerit corrupta hæc gentiliū consuetudo, vt etiam limbis insuper, hoc est, tēnijs ac fasciis quibusdam luxuriatē frontis habitum adstringere, comprimere, modisq̃que omnibus coartare deniq̃. ne ipsæ quidē matronæ turpe sibi, aut honestati suæ flagitiosum ducerent. Exemplum vide. Id verò lib. II. aduersus Gentes huiuscemodi verbis conceptum reperitabis:

Conspiciendis quærerent corporibus fucos, innecterent his colla, laminas pertunderent aurium, imminuerent frontes limbis, fuligine oculos obumbrarent.

Vbi illud quoque animaduersione nostrā nō indignum

dignum occurrit: *Laminis pertunderet aures; vel* certè: *Lacinias pertunderent aurium*: interpolandum videri. vt *Lacinias*, auricularum ansas, hoc est, infimas earum partes interpretemur.

Transgrediamur ad Caput VII. vbi argumentis vicisse me spero, *Lares Latinorum*, siue adeò *Deos Penates*, eisdem esse, quos *Θεὸς πατρώας* indigitant Græci: sed & Romani, ad ipsorum credo exemplum, *Deos patrios*. Cui equidem sententiæ corroborandæ Historicum hocce Dionysij Halicarnassæi suffragium, id loci prætermissum nobis, haud abs re herculè videtur huc infarcire:

Τοὺς δὲ θεοὺς τέτους Ῥωμαῖοι μὲν Πειάτας καλεῖσιν, οἱ δ' ἐξηρμηνεύοντες εἰς τὴν ἐλλάδα γλῶσσαι τῆνομα, οἱ μὲν πατρώας ἀποφαίνουσιν. οἱ ᾧ γενεθλίας, εἰσὶ ᾧ οἱ κτησίους, ἄλλοι ᾧ μυχίους, οἱ δ' ἐρκίους: & reliqua quæ sequuntur. Eodem capite receptam in Horatio lectionem adminiculati, ac tutati sumus in Epodis:

Eamus omnis exsecrata ciuitas.

Idque altero quodam Poëtæ nostri testimonio producto ex Odis, istiusmodi:

Non semel dicemus, Iō Triumphe, Ciuitas omnis, &c.

contra nouitiorum Palæmonū decreta maximè; qui, *Omnes*, eum pse in locum indignissimè intruserant, Iamborum integritatem claudicante

Spondæo

Spondeo suo valgiter deformare ac contaminare
 haud reueriti. quanquam ludus hæc ipsa locusq;
 ac tantum non somnia mera meritò videri pos-
 sint, præut quæ Burrus turbauit nobis, integerri-
 mū prudentissimi Prudentij locum, Peri Steph.
 Hymno, vitioso ac Sicambro succo suo incrustare
 ausus. nam vbi in omnibus Codicibus antea Ho-
 ratianum in morē apud Christianissimum Poë-
 tam legere didiceramus:

Ciuitas omnis pretiosa portans, &c.

noster ille numerorum exactor elegans Culpæ
 notam Prudentiano Carmini adpingere nō du-
 bitauit: atque eius vicem insignitum hoc suum:

Ciuitas quæque pretiosa portans, &c.

Antiquarijs suis obtrudere. Quibus magis maio-
 res etiam vt Centones farciret, seriò insuper co-
 natus est persuadere; *Ciuitas omnis*: parum her-
 culè Latina Ciuitate dignum videri sibi. Sed ve-
 nia danda Iuris (Bartholine, an Apitiani) veteri.
 candidato, & in alijs merèi castris. cui, quid gra-
 ue, si in opere tam magno, tamq̃ue multiformi.
 somnus subinde dormitanti obrepserit?

Quid? peragine aliter hac sacra posse putas?

Poteit quoq. vt supradicta Horatij exempla

Cum vino pariter murcidus ebiberit.

Nam nisi ita foret, dicta haud dubiè iam dies
 Flacco apud Priscianum fuerat, lætæque oppidò
 Latinitatis.

Latinitatis intentata Formula; aut certè:

Civitas quaq. (id quod Prudentio , per imprudentiam nescio cuius, præter meritum suum evenisse deploravimus modò) pro *Omni*, sinistra liberalitate condonatum , relatūq. adeò in librariorum Acta. vt Burrhanicus versus existeret scilicet.

Caput octauum intactum porrò nobis abire non debet, eo loci, vbi scribitur ab Horatio:

• *Beatus Fannius, vltro.*

Delatis capsis, & imagine, &c.

Hunc enim morem iam inde ab antiquo Poëtis illis sollennem fuisse, præter ea, quæ ibidem ex argumento memorata nobis, Attij quoq. Tragici exemplo clarum : qui (proinde vt Plinius affirmat) in campse istam (qua de agitur) Camœnarum AEdem à Fulvio (nî fallor) Nobiliore exstructam primitus , pòst ab Octauiano Cæsare (sicuti diximus) instauratam, imaginem suam viventis videntisq.; & quidē maximam, quum ipse statua exiguissima esset, dedicauit consecrauitq. Atque hoc est , quod Horatius condignè adeò ac Satyricè in Suffeno isto, nimium sibi placente, ac

Maiores, verito nil nido extendere pennas,
exagitat irridetq.; quòd videlicet, *Vltro delatis capsis librisq.* (ruris & inficetiarum plenissimis)

vnà

vnà cum imagine sua, exēplo quidem Attij, præiudicio verò ipsius suo, se se in principum Poëtarum numerum immeritissimo ingessisset. Verba Plinij sic sonant, ex libri natural. Hist. xxxiv. Capite v. fidei caussa maximè, hucce (si pate- ris) transferenda:

Notatum ab auctioribus, & L. Actium Poëtam in Camœnarum Æde maxima forma statuum sibi posuisse, quum brevis admodum fuisset.

Ad illius verò moris illustrationem, quem Capite ix. pag. lxv. in transcurso obiter, & quasi vellicatim attigimus, de *Capitum velatura*, scilicet in nouissima rerum omnium, ipsiusq. adeò salutis desperatione, nullum equidē exemplum accommodatius reperiri posse autumo, quàm Petronianum illud, extremo manifestè periclitantium voto, ex Gytonis persona conceptum:

Præligemus (inquit) vestibus capita, & nos in profundum mergamus.

Capite porrò .x. commemorata nobis haud pauca per causam munerum Natalitiorum, quibus amici potentiores vel propinquos, vel clientes suos premere per iniquissimā sanè ambitionem consueti antiquitus, ad Horatianū illud scilicet:

Natales gratè numeras, ignoscis amicis.

Nec pœnitet enarrationis; pœnitet incogitantæ solùm; qua factum, vt quod maximè in rem præsentem

sentem conducere visum postea, id tum temporis ne legisset quidem in mentem venerit mihi. Macrobianum exemplū inquit, ex lib. 1. Cap. 1 v. Saturnalior. Scin' cuiusmodi? aduerte igitur, ut scias:

Illud quoq. in literis inuenio, quod cum multi occasione Saturnaliorum per avaritiam à clientibus ambitiosè munera exigerent; idq. onus tenuiores grauaret, Publicius Trib. pl. Legem tulit, ut non nisi cerei ditioribus mitterentur.

Haftenus Longæus ille. Neq. cum hac Publicia Lege pugnantia Martialis noster, nusquam non passim in Cereorum, atque id nugarum commemoratione ludos verè Saturnalitorios, more suo, faciens Lectori.

CAPVT II.

QVIRINVS Martis equis Acheronta fugit. Ter, pro Tertium interpretandū. Graues Persæ, ad graue Persici equitatus armaturā potius, quàm ad cladem Crasso ac Romanis illatam trahi debere. Id exemplis ostensum. *Fulgas*, siue etiam *Fulgis*, pro Fulgeas, aut Fulgere possis, ex veteris interpretis glossemate Flacco redonatum, quo loco *Fulges* hodie publicatum legitur. *Volens*, haud de nihilo Horatianę precationi appositum, ut quod Sacrorum solenne verbum iam inde ab antiquo fuisse, Catoniano non minus, quàm Plau-

Plautinotestimonio conuincitur. Eòdem quoq;
 exemplum Sallustij adplicatū. *Pollex*, pro vngue
 pollicis; quem quidem admorsum, furentis, vel
 certè stomachantis animi indicium esse, Petronij
 & Propertij exemplis demonstratum. *Creta*, &
Cerussa discrimen factum contra nou-antiqui
 Commentatoris decreta. Eam in rem Martialis
 laudata auctoritas. Eiusdem, & Petronij exem-
 plorum, de Plautinis festiuitatibus adumbrato-
 rum, conlatio.

Oda tertialibri tertij delibata leuiter nobis Ca-
 pite VII. ad quam denuò vorforiam etiamnum
 capere quid vetat? In ea Iustitiæ cum Constantia
 iunctæ inuictum robur nobis ante oculos poni-
 tur, vsq. ab ipso Hercule, Polluce, Libero patre
 accitis alius auctoritatibus; etiam ab A Eternæ
 illius Urbis conditore, in Deorum Immortalium
 numerum ob meritaretrato deniq., cum Quirini
 nomine:quem inibi

Martis equis Acheronta fugisse,
 prædicat Poëta noster; haud poëticè quidem, aut
ἀνθηροεικῆς (vti Commentatoribus commentū
 placet) sed verò ex publica & antiqua Romanæ
 Historiæ fide, atq. adeò inueterata omniū Quiri-
 tium persuasione. cui nō minus idoneum aucto-
 rem Ouidium quoq. in sacro illo Fastorum suo-
 rum volumine concorditer adstipulari videmus;

H Horatia-

Horatianum hoc quasi enarrantem nobis libro
eiusdem operis 11. & quidem planissimè. quippe
eadem de re institutum sermonē exsequi per-
gentem, de inopino Romuli excessu loquor, item
Poplifugio eiusdem Regis raptum protenus cō-
secuto. Sic enim inibi, posteaquam Martem à Io-
ue nouam nescioquam diuinitatem Romulo fi-
lio impetrantem induxisset, subdit denique:

Est locus: antiqui Caprea dixere paludem.

Forrè tuis illuc, Romule, iura dabas.

*Sol fugit, & remouent subeuntia nubila calum,
& grauis effusis decidit imber aquis.*

Hinc tonat, hinc missis abruptur ignibus æther.

Fit fuga: Rex patrijs astra petebat equis.

Vides, ut cum Horatius disertè cō. entiat Ouidius,
Equorum item Martis meminēs, quibus filium
eius Romulum, *in cali carula templa subuectum*,
Acherōta pariter effugisse videri cupit sanctissi-
mus ille Fastorū scriptor. atq. hoc ipsum est, quod
narrat nobis Dionysius Antiquit. Rom. lib. 11.

Οἱ μὲν ἔν μὴταδ' ἐστ' ἐρετὰ τὸ πρῶτον αὐτοῦ (ἑωμόλου)
ποιῶντες ἐκκλησιάζοντα φασὶν αὐτὸν ἐπὶ στρατῷ εἶδ' α,
ζόφῃ κατὰ σκηνήσαντες ἐξ αἰθρίας, καὶ χαμῶν & με-
γάλης κατὰ ῥαγέντ' α, ἀφανῆ γένεσθαι, καὶ πεπυσμέν-
ησιν ὑπὸ τῷ πατρὸς ἄρεως τὸν ἀνδρα ἀνῆπάσθαι.

Eadē da patrū hercule mihi satisfaciūt interpre-
tes in enodatione numeri ternarij ad versus illos:

Ter

Ter si resurgat murus aeneus

Auctore Phœbo; ter pereat meis

Excisus Argivis : ter uxor

Capta virum, puerosq; ploret.

Omnibus enim in hoc pariter video convenisse, ut finitum pro infinito positum arbitrentur. ego contrà, *Ter*; pro Tertiò, seu potius Tertiùm cautè accogitatè à Poëta scriptum accipio: ut bis tantū Troiam excisam interpretemur. idq. de principis Poetarum sententia ita AENEID. IX. attestantis: *Bis capti Phryges*. quanquam alij non bis modò, sed verò ter etiam captum eueisumque Ilium fuisse volunt; primùm ab Hercule, deinde ab Amazonibus, postremò à Græcis, Imperatore Agamemnone. Huc insuper Fimbria cum Romanis si accedit, quid relinquitur porrò, nisi ut quater Pergamo exscidium factum agnoscamus? Sed verisimile est, Horatium (ut dixi) eorum potius opinionem sequutum, quibus bis tantū Ilienses captos persuasum videbat; primùm (opinor) ab Hercule, iterum ab Argivis Iunonijs Helenam reflagitantibus sibi. tametsi vrbi illi bis vastitatē inductā, ductu atq. auspicijs vnus Herculis maximè, videri cupiat Propertius, verbis illis:

Exiguo sermone fores nunc Ilium, & tu

Troia bis Oethæi numine capta Dei.

Ola eiusdem libri quinta, vbi scribitur:

H. 2. Pra.

*Præsens Diuus habebitur
Augustus adiectis Britannis
Imperio, grauibusq; Persis.*

nihil minus, quàm Veterem Interpretem audiendum cēleo, in Epitheti illius explanatione, quod Lyricus noster Persis assignat, *Grauibus*, inquit, quod quidem ille, *Perniciosus*, interpretatur, propter Crassi mortem, ac eādem legionum scilicet. Ego enim longè aliud mecū & cum animo meo cogito; credoquē pro Cataphractis, hoc est, pro grauis atq. Equestris armaturæ turmalibus positum. quo ex genere vniuersus ferè Parthorum, Medorumque ac Persarum equitatus constabat. Propertius:

*Nēue tua Meda latentur cade sagitta,
Ferreus armato neu cataphractus equo.*

Sed & Serum, Indorumq. eodem Elegiographo attestante:

*Te modò viderunt iteratos Bactra per ortus:
Te modò munito Sericus hostis equo.*

Neq. aliò sanè Fragmentum illud Sallustianum ex incerto Historiarum libro allatum applicandum opinor:

*Equus paria operimenta erant, quæ lintea ferreis
laminis in modum plume adnexuerant.*

Etenim de Tigranis Equitatu sermo institutus videtur, ad quem locum Seruius xi. A Eneid.

Cata-

Cataphracti (inquit) *sunt equites, qui & ipsi muniti ferro sunt, & equos similiter munitos habent.*

Quod reliquum est, idem Epithetum quoque lib. I. Oda II. à Poëta nostro iteratum reperias, ubi canit:

Audiet ciues acuisse ferrum,

Quo graues Persæ melius perirent.

Oda XI. libri sequentis post Albani vini de interioriore nota commendationem, festiua insuper corollarum mentione iniecta, ad Mæcenatis Natalem pariter celebrandum, Phyllidem, (amores inquam suos,) inuitat his verbis: *Est in horto;*

Phylli, nectendis apium coronis;

Est hedera vis

Multa, qua crines religata fulges.

Ad quem locum Commentator hybrida:

Fulges, id est, fulgere poteris, aut, fulgere soles. nō enim eam ad se coronatam venire cupit, sed inuitat, ut apud se coronetur. Et hætenus

pòl quidem ille. Proinde suspicor emendandum, *Fulgas*, hoc est, fulgere possis; ab antiquo verbo *Fulgo*: vnde & infinitiuus, *Fulgere*, penultima breui apud Lucretium, Vergilium, alios. Ex qua nota etiam *Feruo*, pro *Ferueo*, apud eos ipsos lectitatum identidem. vel certè, *Fulgis* rescribendum pro eodem, eiusdem archaismi fiducia maximè. à

quo Flaccus noster alienus videri non debet, qui pari ratione lib; Epod. proximo:

Edit cicutis allium nocentius:

pro Edat, vsurpasse deprehenditur, à præsenti Edim, et vii Edam-deflexum, antiquè, vti dictum est modò.

Oda xxx. libri III. clausulam hoc modo cõceptam inuenimus: *Et mihi Delphica*

Laiuro cinge volens, Melpomene, comam.

Volens dicit, ex formula illa sollenni, atq. hercule per antiqua precantium ac venerantium Deos, cuius apud priscum illum Catonem mentio non semel:

Vti tu sis volens propitius mihi, familiaq. mea.

Item Comicum nostrum Curculione:

PH. . Agite, bibite festina fores,

Potate, fite mihi volentes propitia.

Neq. aliorum spectare Sallustiana illa sententia viderur:

Munificus nemo putabatur, nisi pariter volens. hoc est, ex animi sententia potius, quàm inani ambitione studens, fauensq. ac beneuolens acceptoribus suis. Oda v. Epod.

Hic irrefectum saua dente linido

Canidia rodens pollicem.

Bene hoc loco *Pollicem*, pro vngue pollicis positum obseruauit Interpres vetus, ad exprimendum habitum

bicum scilicet & modum furentis Canidiæ. cui rei firmandæ Fragmentum quoddam Petronianum, in Satyrico eius desideratum, protenus ibidem subiungit his verbis:

Petronius ut monstraret furentem, Pollice (ait) usque ad periculum roso.

Quam eius commentationem, Propertij quoque auctoritate vti constabiliamus, en tibi à Callimacho illo Romano par exemplorum, mi Lector, quisquis es:

*Et sæpè immeritos corrumpas dentibus ungues,
Et crepitum dubio suscitet ira pede.*

Item sub finem libri Elegiarum tertij:

Vngue meam morso sæpe querere fidem.

Oda porro XII. libri eiusdem scribitur ab Horatio de vetula interpole libidinem concitante, crissanteq., cano capite, ætate aliena: Nec illi

Iam manet humida creta colorq;

S tercore fucatus crocodili, &c.

Vbi Commentator Cruquianus interpretamenti vicem subiicit nobis: *Humida, s. ex sudore.* Insanè bene: illud non item:

Cretam appellat Cerussam, qua faciem illinunt meretrices, quæ creta candidissima est sinuillima: sitq; Cerussa ex plumbo & aceto.

Quid enim? Cretane eadem cum Cerussa? Appare: haud placet. & confutat expositionem istius-

modi disertissimè Martialis meus, scribens:

*Quàm cretata timet Fabulla nimbū,
Cerussata timet Sabella solem.*

Cæterum vniuersæ Horatiani huius loci sententiæ pressius aliquanto considerandæ, incredibile est memoratu, quanta à Plauto nostro radiantis luminis alluceat copia. Exemplū spectā ex eiusdem Poetæ Mostellaria laudatum ab ipso etiam Cicerone lib. 11. ad Atticum Epist. 1.

*S C A. Quia ecastor mulier rectè olet, vbi
nihil olet.*

*Nam istæc veteres, quæ se unguentis unctitant
interpoles,*

Vetula edentula, quæ vitia corporis fūco occulūt,

Vbi se sudor cum unguentis consociavit, ilico

Itidē olēt, quasi quom unā multa iura cōfundit

*Quid oleant (Lambini lectionem sequi me
licito) coquos nescias, nisi id unum, ut malè
olere intelligas.*

Cuius quidem testimonij principium & Martialis, & ante Martialem Petronius in vsu prius tralatum, duos de singulari fidelia parietes dealbasse videri possunt, scribentes ambo pariter:

Non bene olet, qui bene semper olet.

Audacius tamē Celtiberus ille, ad Plautinæ huiusce argutiæ imitationē, solidam quoq. Epigramatis clausulā reconcinnare ausus nobis, vbi scribit:

Malo,

Malo, quàm bene olere, nil olere.

Libri eiusdē Oda xvi. de Fortunatorū Infulis:

Illic iniussa veniunt ad mulctra capella,

Refertq; tenta grex amicus ubera.

Vbi Epithetum τὸ *Amicus*,

Parum esse pol videtur efficax mihi,

ad mirabiles atq. omnimodas illas ouilli pecoris,
quas tangit, commoditates satis hercle pro vir-
tute exprimendas. Itaq. haud absonum, neq. ab-
surdum iri visum existimamus, si pro *Amicus*,

Amictus, Horatio porro in posterum condone-
mus: quæ præcipua ouium est commendatio, ut
pellitæ, pulchre q. lanatæ scilicet, ac floccis vestitæ
probè; hoc est, uti (ex Varronianæ disciplinæ sen-
tentia) *lana multa sint, & molli; villis altis & den-
sis toto corpore, maximè circum cervicem: ventrem
quoq. ut habeant pilosum potius, quàm glabrum.*

Neq. enim Apicas, aut minas (uti veteres loque-
bantur) nec decotes, vel defloccatas esse cōuenit,
quas fructuosas euenire velis tibi; neq. pro reijcu-
lis habere, extra ouillam decuriam exigēdas por-
rò, atque eliminandas quàm longissimè. Neque
dissentanea nimium huic sententiæ Ovidiana il-
la de prisci illius ac Saturnij sæculi plusquàm Py-
thagorica abstinencia innocentiaq. agentis:

Ibat ovis lana corpus amicta sua.

H 5.

C A P V T

GENITALIS, eadem cum Natali Iunone apud Horatium. Subgalli cantum patronorum ostia à cōsultoribus pulsantur. Hemistichij cuiusdam à Lucretio (cui falsò tributum hactenus) ad Lucillum tralatio De eiusdem dicto Horatiana quadam sententia mutuata atq. adumbrata penissimè. Alius loci à Propertio, & Martiali illustratio. Fragmentum Lucillianum numeris suis redditū. Positum ante, pro Antepositū, quo modo & Ponitur ante apud Tibullū, per uerā dēon construendum. Bina Lucillij exempla haud aliò, quàm ad Itinerarij eiusdē Campani descriptionem accommodanda uideri.

IN Carmine Sæculari ita porrò Iunonē compellat Horatius:

S iue tu Lucina probas vocari,

S eu Genitalis.

Quo loco *Genitalis*, pro *Natali* positum obseruabis. Hoc enim cognomento præ cæteris maximè *Sancta cluens*, *Magna illa Deūm Regina*, *Io-uisq.* Et *soror*, & *coniunx*. in cuius tutela sceminarum Natales, proinde ut virorum in fide Genij, rerum genendarum auctoris scilicet. vnde & *Nature Deus humana*, probabiliter indigitatus Horatio alibi.

Illud verò Satyræ primi libri prioris:

Agrico-

Agricolam laudat iuris legumq; peritus,

Sub galli cantum consultor ubi ostia pulsat.

à nemine Scriptorum disertius, quàm ab ipso Cicerone interpretatum habemus, Oratione pro Murena:

Multò plus adfert dignitatis, rei militaris, quàm iuris civilis gloria. Vigilas tu de nocte, ut tuis consultoribus respòdeas: ille verò, quò intendit, maturè cū exercitu perueniat. Te gallorum, illum buccinarum cantus exsuscitat.

Ad alterum eiusdem Satyræ locum transeamus:

Vt pueris olim dant crustula blandi

Doctores. idq; Lucilliani honoris gratia potissimum. cui Hemistichium illud à veteri Commētatore ad huiusdē loci illustrationē productum maximè: *Gustavi crustula solus.*

me porrò aliquādo vindice ut redonetur, aio contendoq; perperam hoc ipsum Lucretio ob nominis vicinitatē transcriptum Neq. enim tale quidpiā in toto Lucretio, quāvis diligentissimè euolutò, oculo præsente vsquam mihi videor arbitratus.

Addatur & tertiū eiusdem Satyræ exemplum:

Nil satis est, inquit: quia tanti, quantum habeas. sis.

Fuit aliquando tempus, quum postremam hanc clausulam ita pulcrè reconcinnasse videbar mibi:

Quia tanti, quantum habeas sis.

pro

pro, Censeris, estimaris. nunc Lucilliani testimonij auctoritas, vnde hanc ipsam γνώμην suam mutuatus Horatius, sententiam mutare me cogit: Sic enim Suetonius ille:

*Aurum, atq. ambitio species virtutis utriq. est,
Quantū habeas, tanti ipse sis, tantiq. habearis.
Utriq., s. candidato. nisi fortē, utrumq.; inibi re-
scribendum.*

Sat. II. Si interdicta petes, vallo circumdata
(nam te Hoc facit insanum,) &c.

Ad quæ Interpres: Insanū. i. ardentem in libidinē,
quod custodijs septa ac munita, quā amas. Sem-
per enim ad id plus incendimur, quō difficilius
peruenimus.

Rectē quidem ille. imō her-
culē ex sententia Epigrammarij eius, quod Cel-
tiberio Poëta suggerente sum subscripturus:

Nullus in urbe fuit tota, qui tangere vellet

Vxorem gratis, Caciliane, tuam,

Dum licuit. Sed nunc positis custodibus, ingens

Turba futurorum est. ingeniosus homo es.

Consulatur & Naso noster, multa passim ad hanc
sententiam in Amorum libris more suo ingenio-
sē non minus, quā festiuē colligens. vnde non
absurdē, neq. adeo iniuriā Propertius, & ipse in
Amoris artibus haud tyrunculus utiq. aut hospes:

Contrā, reiecto qua libera vadit amictu,

Custodum & nullo septa timore placet:

Eiusdem

Eiusdem in Commentarij parte ad versus illos:

*Hac ubi supposuit dextro corpus mihi lauum,
Ilia, & Egeria est, &c.* Quibus enarratio-

nis loco subdit Interpres Cruquianus:

*Huiusmodi mulieri, quum mecū concumbit, &
est in meis complexibus, do nomen Ilia & Ege-
ria, quæ pulcerrima fuere. quod & Lucillius ait
in quinto: Et cruribus crura dilaxat.*

Fragmentum Satyrographorum principis vides,
Hemistichij specie propositum tibi. Sed hoc ve-
risimile nō est; eō minus, quod initialem postre-
mi verbi syllabam ratione quantitatis produci
necessum sit. itaq. corrigatur quàm primū:

Et cruribus crura Dilaxat.

vt iam inde à *Dilaxat*, nouum alterius Hexame-
tri exordium instituat scilicet. Sat. III.

*Aut positū ante mea quia pullū in parte catini
Sustulit esuriens, &c.*

Credo *μετάθεσιν* esse, positumq. pro composito
singulari, *Antepositum*. quemadmodum & illud
initio operis Tibulliani:

*Et quodcumq. mihi pomum nouus educat annus,
Libatum agricola ponitur ante deo.*

pro, *anteponitur agricola deo*, secūdum illud Co-
mici nostri ex Curculione: *Quid antepones*

Veneri pro ientaculo? Habes in eodem com-
mentario aduersum illum Satyræ VI.

Si ne-

Si neque auaritiam, neq. sordes, nec mala lustra
Mala lustra, dixit perpetuo Epitheto; nec enim.
sunt bona, ut ad eorum discretionem, Mala, dixi-
rit. Sic & à Plauto; Attica Athena; & à Lucillio;
Campana Capua. Campanam ergò Capuam
 perhibuit Lucillius, ut opinor, in Itineris sui de-
 scriptione, quod Poetam illum omnium doctis-
 simum Roma Capuam vrsus fecisse, atque inde
 ad Fretum vsq. Siciliense porrò, in Satyræ supe-
 rioris explicatione idem ille, quem dico, fidē no-
 bis fecerit Interpres. idq. libri Lucillianarum Sa-
 tyrarum tertij perpetuum argumentum fuisse, ex
 superstitione ipsius Fragmentorum indicio conie-
 cturam haud absurdè facturi nobis videmur. neq.
 alio uorsum pertinere fortasse alterum eiusdem
 Satyrici Hexametrum quoddam, quod ibidem
 modico interuallo à Capua ista Campana disti-
 rum est lectitare, hocce exemplo: *Mantica can-*
theri costas grauitate premebat. Videtur autem de
 se ac vectore suo, hoc est, *quadrupedanti crucian-*
ti (ut quidem Plautus loquitur) cantherio fabu-
 lari, cui hippoperæ vtrinq. dependentes (id enim
 Mantica est) tergaq. ac costas pressatas detritasq;
 vlcerabant onere sarcinarum multo infestissimo.
 Vide Senecam de Prisci illius, & Censorij Caro-
 nis, nimis hercule æstiuè viaticati, pompa ac co-
 mitatu ex prouincia Hispania domum denuo re-
 uorsio-

NORDOVIC. SVCCIDANEA. 31
uersionem, cum Publico imperio faciuntis, Phi-
losophicè dissertantem.

CAPVT IV.

PRORSVS, nouomore, vel antiquo potius,
ex *Sallustio* interpretatū. Vnam farris libram
Sarmeto *scurra*, selibrā *Valerio Catoni* Gram-
matico satis superq; pro diario fuisse. *Ordearius*
Rhetor, in *Cæliana* *Orationis* *Fragmento* quo-
modo apud *Suetonium* accipiendus. *Festi*, item
Plinij eam in rem adducta pro testimonio aucto-
ritates: cui postremò *Hordearios* etiam *Gladia-*
tores debemus. Cubat, pro *Decumbit* acceptū.
Iterum quæ digna legi sint, non quæ semel scri-
benda. Id ipsum ad *Tulliana* sententiā similitudi-
nem dilucidè enarratū. *Enervis* compositio, *Are-*
na sine calce, dictitata *Caligula*. *Ennium* *Maio-*
ris *Africani* res gestas; *Lucillum* verò *Minoris*,
familiares sui, vitam priuatam versibus descri-
psisse. Id argumentis & quidem euidentibus fir-
matum: eadēq; spurij *Commētatoris* erratio in
ambiguo *Scipionis* nomine manifestò detecta.
Generosum vinum, pro *vetusto*; *Lene*, pro *ma-*
turo ac probè excocto sumi oportere. *Aurati* de
Tibulli & *Horatij* locis coniectura in medium
protracta; & *Lene*, utrobique pro temeto substan-
tiuè positum interpretantis.

EIVSDEM libri *Ecloga* v. plus in recessu abstru-
sum

sum latet,quàm prima fronte inspectantibus appareat in versu illo : *Prorsus iucundè coenam pro-*
duximus illam . in quo perspicuè manifesta omnia, præter aduerbium *Prorsus*, ex Sallustio interpretandum pro *Ad summam*, siue etiam *In summa*,rito loquendi genere, quoties inchoatæ affectæue narrationi pausam facere approperantes, tribus verbis quod restat, hoc est, summarim nos exequi, ac Lectorem quàm citissimè absoluerè paratos significamus. Inter τὸ *Prorsus* igitur, item *Iucundè*, constituendum comma. non enim aliter Crispus noster, in coniuratione Catilinaria, de ingenio Sempronix sermonem serens huiusmodi: *Verum ingenium eius haud absurdum,*
posse versus facere, iocū mouere, sermone uti vel
modesto, vel molli, vel procaci. prorsus, multa fac-
etia, multusq; lepos inerat.
 deniq. alibi patissim non semel.

Præcesserat in Horatio modò : *Cui satis una*
Æ Farris libra foret gracili sic, tamq; pusillo.
 Atqui Sarmento scurra continentior contentior-
 que Valerius Cato Grammaticus, cui non dico
 libram totam, verùm selibram farris modò, hoc
 est, dimidio etiam minus pro demenso diurno
 suffecisse, testis fuerit Tranquillus nobis, libro De
 illustribus Grammaticis, auctoritate vsq. ab argu-
 tissimo Epigrammatariorum Bibaculo petita,
 cuius

cuius hos Phaleucos; ibidem propositos legimus:

*Quem tres coliculi (ita enim scribo) & selibra
farris, Racemi duo, tegula sub una*

Ad summam propè nutriant senectam.

Quò applicare possis illud etiam Titinnij:

Libram aiebant satis

Esse ambobus farris nutrire. plus comest

Sola uxor.

Sed quoniam in Suetonij mentionem incidimus, ausim & hîc officium meum facere, atq. hancce occasionem multò hercle bellissimam, haud quesitam, verùm vltro ac fortuito oblatā nobis, quantum potest in ipso articulo ire oppressum: adiecta obscurissimi loci illustratione, ex altero eiusdem de Claris Rhetoribus opusculo acciti. Verba sic habent:

Hunc eundem (L. Plotium Gallum) M. Cælius in Oratione, quam pro se, De vi, habuit; significabat dictasse à Cratino (emenda, Atratino, ex M s c.) accusatori suo actionem subtrahit, & nomine Ordearium eum Rhetorem appellat, deridens ut inflatum, ac leuem, & sordidum.

Mira hîc Scholiastarum titubatio, quos Ordinariis partim, alios multò etiam putidiora substituere haud puduit. Mihi verò relictis Cōiectorum affanijs vulgatæ potius scripturæ subscribere stat

I senten-

sententia. cui me hercules explicadæ, exemplum aliud nullum opportunius reperisse videor mihi, quàm illud à Festo, vbi scribit:

Hordeariū as, quod pro hordeo Equiti dabatur.
 Ut significauerit Cælius, Rhetorem istum Plotiū aliam laboris sui mercedem non merere, neque optimius disciplinæ præmium ab auditoribus suis reportare cōsueſſe, quàm quod ad singularis equi pabulum Equiti ſufficere putabatur. quod proſectò nauci non erat. Vide an huc quoq. accommodare possis Plinianum illud libri XI IX. capitis VII.

Antiquissimū in cibis hordeum, sicut Atheniensium ritu Menædro auctore apparet, & Gladiatorum cognomine, qui Hordearij vocabantur.

Sat. IX.

Trans Tiberim longè cubat is prope Cæsaris hortos.

C V B A T, nempe *in morbo*, (cū Plauto vt loquar) eadem ratione, qua Publius & Marcus Terentij, item Columella, *Decumbit*, vſurpaſſe inueniuntur. qua notione & nobis ſemilatinis hoc vocabulum etiam nū hodie in vſu. quemadmodum & priſci item & Horatiani illius moris frequens ac ſollennis ad amicos animi aut corporis ægritudine laborantes viſitatio. Quod officij genus alibi quoq., Epist. puta I I. libri I I. Satyrico nostro

nostro haud neglectū, quum inter cæteras urbanc
scruturæ incommoditates, assiduasq; molestias
huius quoq. necessitatis fastidium agnoscit, istius-
modi querimonia. *Cubat hic in colle Quirini;*

Hic extremoin Auentino, visendus uterque.

Adde idem verbum ab eodem præterea vsurpa-
tum Sat. III. libri secundi:

Mater ait pueri, menses iam quinque cubantis.

Denique Ouidio in Epistola Acontiana:

Hæc cubat, ille valet.

Sat. x. & vltima præcipit nobis Flaccus:

Sape stylum veritas, iterum, quæ digna legi sint;
Scripturus. Cuius sententiæ acumen ex

iudicio Tulliano, quod quidem in Bruto suo de
Liuij Andronici; Poëtæ quantum cluit Latino-
rum antiquissimi, Comædijs fecit, liquidò de-
mum est intelligere. Sic enim inibi:

Nam & Odyssæa Latina est sic tanquam opus
aliquod Dadali; & Liuiana Fabula non satis
digna, quæ iterum legantur.

Vnde parer, secundum in Horatiano exemplo
comma inducendum, ac tò *Iterum* pariter cum se-
quentibus sine vllò interpuncto construendum,
contra publicum Editionū nostrarū consensum,
& quasi cōiurata suffragia. Quo intellectu dixe-
rat Satyricus antea in eapse hæc Ecloga:

Nec redeant iterū atq. iterū spectanda theatris.

I. 2.

Eodem

Eodem spectat & sermo ille Prouerbialis notissimus: *δὲς καὶ τοῖς τὸ καλόν*. Deniq. quod à Poeta nostro in Arte alibi cōmemoratur de Picturarū cū Poësi inter se collatarum dissimilitudine:

Hac placuit semel, hac decies repetita placebit.

Sat. I. libri II. *Sine nervis altera, quicquid*

Composui, pars esse putat, &c.

Hoc scriptiois genus Caligula Cæsar non infestivè, *Arenam sine calce*, vocitabat: cauillum istud in Senecam, eloquentiæ nomine maximè id temporis placentem, vana æmulatione iacere ac detorquere solitus, teste Tranquillo: proinde quasi tu *Scopas dissolutas* dictites. Ad illud porro ex Trebatij persona prolatum:

Attamen & iustum poteras, & scribere fortem,

Scipiadam ut sapiens Lucillius,

subijcit ibidem hybrida iste commentator noster quasi Poëtæ Iuriconsultus dixerit:

Si non potes gesta Caesaris scribere, at potes iustitiam & fortitudinem, ut Lucillius Scipioni fecit, qui vitam eius priuatam descripsit, Ennius verò bella.

Vnde vitam Scipionis priuatam, domestica s̄q; ac politicas virtutes, à Lucillio descriptas liquidò est recognoscere. & hætenus quidem ex rei ipsius fide. Errat verò in ambiguo Scipionis nomine. Constat enim Ennium Scipionis quidem res gestas ac præclara militiæ facinora

nora grauiſſimis iuxta, ac luculentiffimis verſibus celebrauiſſe: verùm hercule Africani illius Maioris, quem cum A Emilianò Numatino iſto, nepore inquã eius adoptitiò, ſic temerè confundi ſanè æquũ nō fuit. cuius actiones priuatæ, domi- q; atq; in toga, nō verò res bellì geſtæ, omnis deniq; vrbanæ vitæ curſus vrbaniffimè, à familiari ſuo Lucillio in Satyris, quaſi Tabellæ Votiua ſimulacro propoſito, depicta ac pertractata. id quæ diu adeò poſt Ennij Poetæ, atque ipſius Maioris Scipionis exceſſum: qui poſterioris huius auus cluit; quæſita à Paulo A Emilio per orbitatem filij adoptione. Sed hoc (vt aiunt) *μνημονικὸν ἀμάρτημα*.

Epiftola xv. libri 1. ad Gn. Vmoniũ Vaâlam.

Ad mare quum veni, generoſum & lenere quiro.

De interiore nota Conſulare, ac *vetuſtate vinum edentulum* cum Plauto interpretor. Præcipua enim doſtemeri, ab ætate vt commendetur: quæ ſola generi huic pretium faciebat antiquitus. vnde non iniuria ſanè *Generoſum* dictitatum Horatio; ex opinione nobis etiamnum hodie, quaſi per manus vetuſtatis, tradita tranſcripta quæ; qua nobilitatem potiſſimum ratione antiquitatis metiri porrò atq; æſtimare didicimus. Sed & *Lenitatis* quoq; ab eadem cauſſa, hoc eſt, ſuauitatis nomine, ex multorum annorum coctione cōtractæ

vinum suum commendat Horatius noster. quò illud etiam libri Carm. I II. Odæ XXI. referri licebit:

Descende, Cornino iubente,

Promere languidiora vina.

cui cōtrarium hoc quod *Austernum* perhibemus, præcoquum, insitæq; adhuc acerbitalis plenū oppidò; & quod longa dies necdum mitigauerit scilicet; nedum vt ob extremam senij maturitatem Edentulum Plautino iure appellitari possit scilicet. Aurato tamen (at cui viro?) *Generosum lene requiro*, coniunctim & sine vlla copula legi acrescribi placebat: commoto exempli illius auctoritate maximè, quod libri primi Elegia IX. apud Tibullum in hanc rem obseruatum dicebat sibi; verbi gratia:

Ipse Deus cupido permisit lene ministro,

Ederet ut multo libera verba mero.

Vnde non pro adiectiuo modò, sed verò & substantiuo interdum à veteribus nomen istud usurpatum contendebat. cui originationi firmandæ præstò ecce subsidiū nobis à Donato, qui Bacchici illius cognomenti plantaria à *Leniendo* deducit; quòd vinum mentem leniat scilicet. contra aliorum sentēcias, quibus ἀπὸ τῆ ληνῆ potius, hoc est, à torculari formatum placet. quod ipsum ijdem Grammatici illi ἀπὸ τῆ λαινω. i. tero, comprimo, seu torqueo radices egisse videri volūt. Mihi verò

aqua

aqua hîc hæret; atque eò magis, quòd Epirheta istæ Horatij gemina, *Generosum* dico, & *Lene*, ad *Vini* mentionem, quæ secundo abhinc versu antecesserat modò, haud inconciennè retrahi posse intelligam. adde, quòd supradictum Tibulli locum haud leuiter suspectum faciat nobis variantium scripturarum controuersia.

CAPVT V.

COMMVNIS lectio in Horatio defensa simul, atque enarrata planissimè, contra Grammaticorum Equitum sententias. Afranij, Pomponij, ac Nouij, trium principum Atellanico-rû Poetarû etates non minore cura, quàm fide examinata pariter, ac distincta. & huius quidem nomen in Nauianû locû è fuga postliminiò reductû. Loci alterius discussis tenebris illuminata obscuritas. Alia quadã moneta probioris.

EPISTOLA XIX. post Satyricã gloriatiônẽ ita porrò ipse de se paratrageœdiare pergit Horatius:

*Non ego nobilium Scriptorum auditor, & vltor
Grammaticas ambire Tribus, & pulpita dignor.*

Mira hîc Grāmaticarû Tribuû concertatio super voce, *Vltor*, partim de Veteris Cōmentatoris sententia pro *Iudice*, partim pro *Laudatore*, incitissimè suamentiû. Inuenias etiã, qui *Actor*, pro *Vltor* Horatio benignè de suo cōdonare ausi, ne longû;

*Omnibus unus**Error, sed varijs illudit partibus.*

quem tamen ex notissima indignatione illa, unde Satyram suam auspicatus Iuuenalis, vno ictu discutere, inq; noxia manifesta prehensum confutare nullo sane negotio possis. verbi gratia:

*Semper ego auditor tantũ, numquã mne reponã,**Vexatus toties rauci Theſeide Codri?*

Significat enim Horatius ex eo se Poëtarum genere nō esse, neque in ijs nomen profiteri suum, quos improba quadam, ne dicam insanabili scribendi pariter, ac recitandi prurigine accensos, aurium operam frequentem aliorum importunitati locare & commodare non pudet, quamuis inuitos atq; ingratijs suis maximè, nulla alia re, nisi vt & ipsi pariter mutuum facere, atq. hostimentum par pari referre in tempore possint; iustissimo ultionis genere eos inuicem auditores habituri, quos toties *plena rursus & inficetiarum* carmina recitantes, præter animi sui auriumq; sententiam antea indignissimè perpessi. ne exercitoribus suis porro sit impune, quod præ ipsorum recitatione res suas omnes relictas habuerint scilicet, tantum non ad languorem auscultando dati.

Epistolam porro Augusto inscriptam operæ præmium fuerit excutere. in ea dignum vindice hocce occurrit primitus:

Nanum

Nanius in manibus non est, & mentibus haret

Panè recens: adeò sanctum est vetus omne poema.

Credo emendandum, Nonius, à vii & Nanius: vt nobilissimus Atellanarum scriptor post Lucios illos, Afranium & Pomponium dico, nominatim intelligatur. Eum autem verisimile est, paulò supra C. Cæsaris ætatem floruisse in Scena; tantū abest, vt sæculum illud; cuius solius spatio bonorum poëtarum existimationem terminari, questus fuerat Horatius modò; illis temporibus perficere potuerit. atq. ea ratione inter veteres, quasi Maiorum gentium Classics illos, hoc est, inter probos & perfectos Poëtas censerì. vnde famam carminum eius apud posteros quasi sordidatā iacere, minusque hæc ipsa sæculi sui auribus probari; sed præ vetustioribus illis, Afranio puta atque Pomponio, vilia ac contemptui esse, lamentatur Satyricus noster, plus satis Satyricè. ita enim Romanam plebem animatam, vt præsentia ac secum nata superbo despuens fastidio,

Ad Fastos redeat, & virtutem æstimet annis,

Mireturq; nihil, nisi quod Libitina sacrauit.

Proinde quid mirum, si Nonii Atellanæ in manibus vulgi non sint, neq; publicis in Scenis versentur. flores & crocum cum Matertera Atta recto talo perambulantes; qui pro receti adeò, nuperoq. ac nouitio Poëta æstimetur ab omnibus? Quod si

receptæ lectioni propugnatores venire voluerimus, fateamur necesse est, inter se pugnantia argumentari Horatium, qui Nævium queratur in manibus non esse. quod contrà est. atq; ei opinioni cum sequentia, tum superiora fidem nobis facere abunde possunt. nisi si quis rescribi oportere contenderit:

Nævius in manibus nunc est, &c.

inducta negationis particula. Nævius enim Latinorum, quātum fuit, post vnum Livium Andronicum antiquissimus. At priori cōiecturæ nostræ cōsentit Veteris Interpretis expositio; qui ad nomen istud, puta *Nævius, Junior Poeta*, palam commentatus est nobis. Vnde manifestò dilucet, Nonij titulum hoc loco falsò ac præposterè, sub Nævij persona hæctenus fefellisse. eadēq; illorū pariter errorem in procliui fuerit confutare, qui nomen istud notissimi Atellanarum poetæ nusquā non mendosum obiecerunt nobis; *Nonium* passim, pro *Nonio* promiscuè substituentes. quum hoc tamen verbum priore syllaba productū, contrà primum illud correptum legi debere, ipsa numerorum ratio eosdem commonescere potuisset. Proinde ita apud Noniū quoq; Marcellum, primarium Poetæ cognominis sui laudatorem, ceterosque porrò Grammaticos, me vindice atq; assertore restituatur in posterū. Quod verò Nonium

nium hunc nostrum, non Afranio solum Terentianis temporibus suppari, sed verò Pomponio quoque, & ipso Atellanico Poeta, ætate fecerim posteriorem, nemini nouum hercule aut mirum videri debet, qui quidem Velleij istud Paterculi, memoriæ commendatum habeat satis:

Sanè non ignoremus, eadem atate (qua scilicet æqualis Sisennæ Rutilius, Claudiusq; Quadrigarius, & Valerius Antias maximè viguerunt) *fuisse Pomponium sensibus* (pro Sententijs positum accipio) *celebrem, verbis rudem, & nouitate inuenti à se operis commendabilem.*

Namq; operis istam nouiter à Pomponio excogitati mentionem, equidem nullus dubito, quin ad diuerbiorum nouitatem, hoc est, ad Atellanas (quæ quidem Fabulæ maximâ in Exodijs; Trægœdiarum tristitiæ, oblectâdi per ludum & ioculum spectatoris causa, interponi solitis; iucunditatē habere putantur) trahi ac referri debeat. eiusdem mox obitu miserè ac turpiter aliquândiu interruptas, desitasq. ad tempus, & quasi pro derelicto habitas, non quidem Exodiariorum, i. personarum Histriorum, sed verò Poëtarum, festiuissimum hocce Atellanici Poëmatis genus tractantium inopia maximè. donec Pomponio condignus aliquando successor obtigit Nonius iste Horatianus; quamuis iusto temporum interuallo
ab

ab eiusdem ætate diuisus discretusque. Vnde & nouitas ipsius à Populo, solius vetustatis fautore ac admiratore, minus secundo vel æquabili plausu excepta; si quid Poëtæ (Lucano, an Appulo?) credimus. Testem ei rei, & quidem Consularem, facio Macrobius, qui eum pse Noniū diu iacentem artem Atellanarum de-integro resuscitasse, præstare paratus sit nobis. Neque verò indignabitur spero Afranius, quòd nouum istud Exodiorum genus ex fide Velleiana principi Pomponio acceptum referre ausus fuerim scilicet. Quid enim? Quæstorij ordinis Historico secundas agere hac vtiq. in parte; tutius demum visum consilium mihi. tametsi non ignorem, Afranium quoq. laureolam sibi ex hoc ipso mustaceo quæsiuisse, sed clementer tamen, & quasi tralatitio conatu potius, quàm prospero Perficæ propitiantis effectu; atq. ita, vt Togatarum eum verius (quas Tabernarias dictitabar Latinitas vetus) quàm Atellanarum nouitate posteritatis auribus commendabilem facere se voluisse persuasum sit mihi. In quā sanè partem præ cæteris Togatariis omnibus, nec ipso quidem excepto Ennio, palmam idem meritò possidere iudicatus, de communi priscorum sententia. idque illi ad solidam oppido & veram gloriam sufficere debere putandum. Scitum enim est Maronis illud:

Non

Non omnia possumus omnes.

Aut ego hallucita sum prorsus, aut comma, quod in medio est, inducendum illo versu:

Maiores audire, minori dicere, per qua, &c.

post, *Audire*, scilicet. vt *Dicere minori*, pro *dicentes*, hoc est, præmonstrantes, dantesque quasi præcepta porro iunioribus, positum accipiamus.

Subnectamus & alterius loci ex eadem Epistola explanationē, à nemine hactenus, quod sciam, percepti satis, nedū sincerè interpretati, vbi scribitur à Satyrico nostro:

Ille per extentum funem mihi posse videtur

Ire Poeta, meum qui pectus inaniter angit,

Irritat, mulcet, falsis terroribus implet,

Vt magus : & modò me Thebis, modò ponit Athenis.

Funambulus enim, interim dum in transenna

Suspensus, similisq; per omnia caesaundo,

nutare, vacillare, & quasi ruinam desuper in subiectam circumstātium turbam minitari videtur, varios, multiplicesque, atque inter se pugnantes istiusmodi affectus spectantium animis concinnare atque inlinuare consuevit. quos cassa formidine districtos idētidem, ac falsis terroribus completos; prorsus, omnibus modis anxios, mireque, imò miserè sollicitos atque exercitos habet. nimirum seriò metuentes, ne *viator iste aërius*, inter
terram

terram ac cælum medius :

Corpore dum instabili gressum per inane gubernat,

Dispennens aquis brachia ponderibus;

More tuo Phaëthon, pessum praeceptisq; volutus

Per caput atq; pedes irredimius eat.

nec tantum brachia, aut crura modò, sed verò & ceruices defringat sibi. Quibus idem tamen contrà subinde securitatem suì præstat deniq; , secum ac cum animo suo reputantibus , solitudinē pavoremque hunc suum de nihilo, imò verò nauci nō esse, pro eius tenebrionis salute, qui istiusmodi ludo iam inde à puero lustrare consuetus, nihilo maiore periculo per extentum funem, libratis dexterrimè vestigiis, *cursus dirigat arte suos*, quā si in solido pedem ponere spectaretur.

C A P V T VI.

P O E T A E nostro, in verbo Refulget, de nouo interpretamēto gratia facta. Trogi Pompeij cum Horatiano exemplo cōlatio. Stygij fluctus. Seria seueraq; in eosdem habita quaestiones. Cruenta, per praposteram pietatis ac religionis speciem, Carthaginensium sacrificatio. Impuberis etatis respectu maximè immanissimorum etiā hostium animos ferociamq; ac barbariem emolliri, & quasi ad mansuetudinem traduci. Pacem peti

peti & à Dijs posse, veterum exemplis representatum largiter.

H A C T E N U S ordo, & Poetæ ipsius œconomia seruata:

Nunc verò; ne non redeat labor actus in orbem;
curriculo iterato, ab ipsis vsque carceribus vorso-
riam denuò ad calcé capiemus; analecta, & quic-
quid antea præteritum nobis, obiter & quasi in
transcursu collecturi.

Quo in lustra, vide, an ad censerì possit & illud,
Vestigatum oculo prætereunte mihi:

è libri Carm. II. Oda XVII. vni & vnico illi
Mæcenati inscripta:

Vtrumque nostrum incredibili modo

Consentit astrum: te Iouis impio

Tutela Saturno refulgens

Eripuit, volucrisq; fati

Tardauit alas, &c.

Quid enim? *Refulgens*, hoc loco notione haud
perinde trita positum, interpretari bona hercle lu-
bido est mihi; pro *opposita*, atque *ex aduersum* ful-
gère; hoc est, fulgore, siue adeò aspectu suo ob-
scante contrà, & velut obnunciante Saturni mina-
cijs, ac paterni sideris malignitati. Et verò campse
articulo huic vim subesse interdum, animaduer-
sum vobis Commentariolo anni superioris, in
verbo

verbo *Resonat*, exempli gratia :

Suâne locus voci resonat conclusus, &c.

quod pro Contrâ adsonat, obiecta Echûs repercussione iocosa, ibidem quoq. id temporis consimiliter vsurpatum docuimus.

O D A verò tertiâ libri III. multa quidē haud segniter, aut somniculosè, post tot Commentatorum symbolas, edolata atque exterebrata nobis; illud tamen per incogitantiam (vt fit) commonefacere oblitis:

Troia renascens alite lugubri

Fortuna, tristi clade iterabitur.

eodē trahi posse scilicet Pompeianæ illius sententiæ acumen, quæ sub libri XXXIII. finē apud Iustinum legitur, eiusdem verbi metaphora in eiusdem gentis prædicatione opportunissimè videntem.

Iuuabat Ilienses nepotes suos, (S. Romanos)

Occidente & Africa domita, Asiam, ut auitum regnum vindicare, optabile Troia fuisse ruinam dicentes sibi, ut tam feliciter renascerentur.

Illud autem libri sequentis Oda octaua inobservatum nobis abire non debet:

Ereptum Stygijs fluctibus Æacum.

Etenim an Styga istam, Styga dico? Imò adeò *Infernis è fluuijs aliquem*, fluctibus attolli credam,

dam, nescio. hoc probè scio, languorem ijsdem,
ignauiamque, ac torpedinem

A reliquis passim Scriptoribus assignari.

Ouid. *Styx nebulas exhalat iners.*

Item Tibullus lib. IV. Elegia III.

Me vocet in vastos amnes, nigramq; paludem

Diues in ignaua luridus Orcus aqua.

Omnes deniq. qui leguntur, omnes,

Maiorum quasi gentium Poeta,

Prisci dico, sed & recentiores.

In quæis, Thori, animo tuo meoq;

Iusto & iudice, nec recentiorum,

Nec cuiquam veterum cluit secundus,

Vnico magis unicus Secundus.

in cuius Ecloga illa, non minus vnica atque singularia, quam ipse auctor, ex vidua Orphei lamentantis persona, ac plusquam Lessum faciuntis Eurydicæ suæ lugubriter pronunciatum legimus:

Et haud multū (memini) distamus ab umbris

Mæsta per ignauam quas voluit cymba paludē,

Squalida peioris nantes confinia ripæ.

Cur exempla foris, cur verò aliunde petamus?
annè illud Horatii ipsius obliti scilicet?

Visendus ater flumine languido

Cocytus errans, &c.

Quo Epitheto (Languido, inquam) peream, si
K quod

quod aliud Lacui isti Acherusio excogitari potuit aptius, vel accommodatius: ob turbidi spissatiq;, atque (vti Satyricus Aquinas autumat) cœnosi gurgitis tenacitatem, imò plusquam pulmoneam aluei illius Auernalis lentitudinem maximè . ita quasi visco, resinæue, vel pice quadam potius

Succreta Infernis torpent vada lurida ripis.

vt paludibus, aut lamis, quàm fluuijs propiora videri possint. Et historicè magis, quàm Poëticè Propertius, qui eadem *Lethæa* ista haud flumina, sed *Stagna* appellitauerit . quippe quæ nec ventorū vnquam (quibus, illis in locis, locus non est) vesalientium procellis inquietantur: neq. *Venilia*, aut *Salacia obnoxia*, stata alternantis æstus reciproca-tione nunc huc, nunc illuc (rursus, an prorsus ?) impelluntur. haud magis vtiq;, quàm Lacus ille Syrius,

(*Non Lacus,*) vt fama est (sed verò infame *Bidental.*)

æternæ item sterilitati dānatus (vnde ex re quo-que *Mortui Mariæ* appellationem indeptus) nec minus suoapte ingenio stabilis atque inconcussus oppidò, resistēte vsq. turbinibus bitumine, quod (vti apud Trogum est) aquam omnem stagnan-tem concinnat. Sed in hoc Acherūtis, & Asphal-rites Lacus dissimiles, quòd iste omnis (vt ferūt) nauigationis impariens; ille contra

Ferre

Ferre solens transmissa una, tot millia cymba.

Cymba, haud corbita dico : atque ea quidem *cariosa*, *ferruginea*, & (si Maroni credimus) *rimarum plena*, ac *futili*; imò verò *futili*. quæ qua ratione aut decumanæ illi vndantium aquarum impotentia, aut calamitosæ tempestatis minacijs, collisiſque inter se turbinum supernè incumbentium procellis par esse obſiſtendo poſſit, ij viderint porrò,

*Qui montes nobis vaſto cum murmure aquarū
Auſi Acherontais tollere vorticibus.*

Quod vt dubitanter pronunciem tamen, & ſuſpenſa (quod aiunt) manu; eiſdem Maronis auctoritas me ſubigit. Et verò principis Poëtarum fidem forcillare, non eſt meum:

*Qui, præter raucos Acheruſi fluminis æſtus,
inſuper arenarum etiam Cocyti cieſtamenta ag-
noſcit, lib. AENEID. VI. occinens nobis:*

*Turbidus hîc cœno, vaſtaq; voragine gurgēs
Æſtuat, atque omnem Cocyto eructat arenam.*
Vnde & nos haud nimium inſcitè olim, (vti arbitror) pro captu eiſ, quam tum agitabamus, ætarulæ, tãti auctoris fiducia inaximè, Poeticam huiuſcemodi argutiolam extricare auſi fuimus in puerili quadam ad argutiſſimum Altarium Elegia:

Gratior adueniam lucis habitator opacis,

K 2

Nec

Nec metuam Lethes assilientis aquas.

Adiuuat vtriusque nostrum sententiam Paludi illi *fragorem horrifonum*, ne *perterricrepum* dicam, ac plusquam *Fluuiiale murmur* attribuens Naso, quo loco canit:

*Quiq; per Infernas horrendo murmure valles
Imperiurata labitur amnis aquae.*

Plura adituere possim, nisi hæc ipta plus satis superque oppido esse arbitrarer, ad lectori meo persuadendum, nec Poëticae historiae fidem, nec sacrosanctas illas Latinæ proprietatis leges, in Stygiorum fluctuum commemoratione, ab Horatio nostro per incognitiam migratas videri.

Transeamus ad illud Odes v. ex Epod.

*Impube corpus, quale posset impia
Mollire Thracum pectora.*

Quorum versiculorum sententiam Trogi Pompeij animo obuersatam, quid prohibet suspicari? apud Iustinum abbreviatorem suum, de cruenta illa Sacrorum religione, ac nefaria puerorum pro salute publica immolatione apud Carthaginienses usurpata antiquitus, secum cumque Lectore suo stomachantis haud iniuriâ, hac historica indignationis serietate lib. xlix. sub finem:

Quippe

Quippe homines, ut victimas, immolabant; & impuberes (quæ ætas etiam hostium misericordiam prouocat) aris admouebant, Pacem Deorum sanguine eorum exposcētes, pro quorum vita Dî rogari maxime solent.

Vbi notandum (vt & hoc quoque in transitu admoneam) antiquè. i. propriè, atque ex Romanæ Votorum sollenniû disciplinæ formula eloquutum Pompeium. Plautus Amphitruone:

Iube vasa pura actutum adornari mihi,

Vt Iouis supremi multis hostijs pacem expetam.

Pax enim, & venia, eadem prorsus in Deorum suppliciis. Vnde vtraq; coniuncta ferè apud Ciceronem lectitantur. vt pro M. Fonteio:

Ille nationes in bellis gerendis ab Dîs Immortalibus pacem ac veniam petunt.

Item àlibi haud semel. *Exposcere ergo Deorum pacem;* siue, vt cum Arnobio, *Exambire;* cum Plauto meo, *Exorare* dicam; atque *Exobsecrare;* nihil aliud fuerit, quàm volentes propitios, pacatosq; ac tranquillos Deos concinnare:

Votisq; ac precibus, nec parca eade bidentum

A superis veniam conciliare sibi.

Atque hæc interior dicti istius significatio, in quâ plura testimonia qui volet, Marcellum consulari suadeo, in eiusdem rei, hoc est, *Pacis à Dîs petendæ* explanatione.

BONVS, *pro Domi nobili ac generoso. Gelu acutum, quo sensu accipiendum. Eius vredinis contagies Marcore inducto membra putrefaciens, Viq̃ue sua penetrans non sine perniciē. Interrogationis nota Horatio redonata. Lapidēs varij. Eam in rem à Seneca Tragico producta auctoritas. Adverbij r̃s Vt, iteratio, ad migrationem Casuræ euitandam scilicet. Eius obseruatio bono Poëta cum primis necessaria. Albij Tibulli in Poëtando extemporalitas, celere s̃q̃ inuenantis ingenij motus, ad Cassij Parmensis exempli similitudinem. Ea res Elegiographo illi non vitio tributa, sed laudi. Mendarum, siue Erratorum, Quēis humana parum cavit natura, quæq̃ in superiore illo ad Horatium Commentariolo inter excudendum temerè, siue adeò fortuitò obrepserant, recensio, addita singulorum restitutione.*

AD Horatium denique postliminio conuortamur, hæc de semet porro Satyra 1. alterius Sermonum libri, coram Trebatio I. C.^{to} familiari suo profitentem publicitus:

Me pedibus delectat claudere verba

Lucilli ritu nostrum melioris utroq̃ue.

Ad quæ Commentator Cruquianus:

Hoc

Hoc est, qui melior fuit & te & me, ô Trebati, censu & natalibus. Fuit enim vir bonus, & valde nobilis, utpote Magni Pompeij auus.

Insanè bene, atque adeò ex ipsissima Satyrici Poëtæ sententia, qui *Melioris*, ἀριτῆς Generosioris, seu nobilioris posuisse videtur. Quomodo & Martialis noster:

Nam puto nec melior, Nauole nec prior es.

Neque nos in quotidiano vernaculi sermonis vsu aliter hoc verbum vsurpare consuemus, dicendo:

Ikken so goet/ als ghy. Valeant proinde cum glossematum suorum senio, qui *Bonitatem istam Lucillianam*, ad æquitatem, constantiam, beneque ac puriter actæ vitæ probitatem accommodandam autumant. quando non aliò (vti dictum est modò) quàm ad veterem aui illius Pompeiani prosapiam, confertasque gentiliciarum Imaginum struices, ad fumosos honorum gestorum Titulos, singulisceris subscriptos, trahi debeat. Quarum rerum Trebatium non minus, quàm seclè Libertini generis hominem, inopiam pati manifestò designat: in transitu & veluti aliud agens, Consultori illi suo, scientia Legum magis, quàm Natalium claritate spectabili, adperso Satyricæ amaritudinis sale, nouitatem atque obscuritatem generis haud obscure adeò,

neque dissimulanter obiectans . Sic in eodem Testa angustiam rei familiaris ab ipso Tullio in Epistolis sugillatam nimium familiariter , notauimus iam olim .

Legitur protenus Satyra ab hacce tertia , festiuissima , ex Stoici Damasippi persona , cum Poëta nostro di ceptatio , hac ipsa similitudine in non vnus stultitiæ genere definiendo vtentis :

Non est cardiacus (Craterum dixisse putato)

Hic æger : rectè est igitur , surgetq; negabit :

Quod latus , aut renes morbo tententur acuto .

Quam postremam dictionem Commentator , pro *Penetrabili* , *perniciosoq; ac graui* , enucleat nobis . eadem (opinor) ratione , qua alibi , *Gelu acutum* , i. penetrabile . Venusino huic nostro cognominatum acceperat . quod vi scilicet , atque horroris sui acrimonia quasi penetrare videatur , quemque attigerit semel . Neq; inconsultè Lambinus , qui ad eumse locum illum , hos qui niuem tractant , & qui à frigore offenduntur ac læduntur , simili quodam modo affici existimat , atque eos quos ferri acies pupugerit . Atque id ipsum plus satis superque quotidiano ab vsu , in hac hyemantis patriæ asperitate , seu inclementia potius , de nobis ipsis edocti , sensibusque nostris , ac rei ipsius experimentis gnarum exploratumque habemus . illud verò ex auditis atque ex nostratum

strarium mercatorum relatu modò, eorum dico, qui quæsti sui gratia maritimis negotiis affines,

*Callosis Scythicas pedibus calcare pruinas,
Sarmaticasq; niues, Lituanorumq; paludes,
Arctoaglacie concretas crustatæque, trahis penetrare ac percurritare soliti. Hi enim pro certo, imò comperto; nec auriti, sed oculati testes prædicant; eam esse in locis ac regionibus illis Septentrionalibus hyberni sideris violentiam, atq; intemperiem; geluque intensum adeò, ne dicam intractabile;*

Vt cuicumque acie perstrictum frigoris, ictu

Vel tralatitio membrum aliquod fuerit;

*(Ora puta, auriculæ, & si quid promineat fors,
Brachia, crura, pedumve aut manuum digiti:)*

Ei verò pars illa geli contage perusta;

Corruptæq; imò morticinæ similis,

(De calo ceu tacta, afflataq; sulphure sacro)

In putrorem omnis vertat, & in cariem.

Sensim obbrutescens: vel eò facta arida donec,

Casabunda locum deferere occipiat.

Vastitiesq; ac dissidium, & distractio tandem

Affecta domino particula eueniat.

Quæ reliquo sese fugitiuam à corpore spernit,

Suppositus, labem marcida dans, manibus:

scrobiculiq; ac lacunæ impressa stigmatiæ suo vestigia, notamq; veluti insignitam relinquit in posterum; brumalis sænitæ monumētum. Ita haud secus, quàm si cutis cauterio inusta; aut succidua illa carunculæ portio scalpello, atq; adeò artificis manus industriâ cautè & cogitatè exempta atq; exsecta fuisset, subluridarum porro passim cicatricum reliquiæ in facie, vel alia quacunque tandem corporis parte, laxitalq; ac exesorum quasi sinuum vacuæ quædam areolæ comparent.

De ijs autem, quæ sequuntur, interrogationis notulam in medio desideramus, ad hoc, quod in ante posituri sumus, exemplum:

*Non est periurus, neque sordidus: immolet equis
Hic porcū Laribus? verū ambitiosus, & audax:
Nauiget Anticyram, &c.*

Eadem nempe cōpositionis forma, qua illa, quæ antecesserat modò, suo à nobis loco utiq; repræsentata tibi. id quod Dionysium sanè illum, cum reliqua Scholiastarum nostrorum decuria,

Peruidisse oculis lippum demiror inunctis.

In Satyra huicce proxima communis lectio sedulò nobis defenstrata iam antea, aduersus Glareani, imò Erasmi ipsius præiudicatas opiniones, versu illo:

Tē lapides varios lutulenta radere palma?

Ad

Ad cuius scripturæ fulcimentum, præter exemplā in medium producta id temporis, illud pro mantissa quoque accumulare possis in super, ex vnius vniciq̃ue (reliquum quem habemus modò) Cordubensis Tragici auctoritate:

An ferax varij lapidis Carystos?

Satyra verò libri eiusdem septima ita legitur:

Duceris, ut nervis alienis mobile lignum:

Neque aliter Turnebus, Muretus, Lambinus, Cruquius denique. Ego tamen, *Signum*, malim potius: quasi tu *Simulacrum*, siue *Icunculam* interpretere. Quod *Sigillariorum* genus *ὑδροπασσι* indigitabant antiqui, Platoni *δαδάλης ἀγάλματι* dicta. *αὐτόματι* nescio quæ *Oscilla* scilicet, Mimica prorsus ac gesticularia, quæ certis fidiculis agili manu adductis impulsisque, ac nervorum intus fallentium motu atque agitatione, pro Chironomontis, qui eosdem illos tractat arbitrio ac moderamine, non sine venustate quadam nunc in hâc, nunc in illam partem mobilia versatiliaque cluebant, vsque ad miraculum, vel stuporem potius inspectantium, muliercularum credularum plus satis, ac puerorum infantium maximè, qui (vti festinè Lucillius aurtumat)

*Credunt signa omnia athena
Vivere, & esse homines, &c.*

Signum,

Signum, proinde (vt dixi) Horatiano huic loco restituendum, vel Ouidio subscriptore, quum scribit:

Truncus iners iacui, species, & inutile signum.

Quam lectionem qui peruolgatae isti antistare non videt, quid verò homini illi vlla lectione est opus?

Ad Eclogæ porro nouissimæ vestibulum gradum aliquando capeſſamus; in quo Cruquianæ scriptionis auspiciū, præ Lambini atque aliorum commentis, non possum non vtraque manu amplecti, atque asserere, hacce numerorum dimensionē conceptæ:

Vt te Nasidieni inuit cœna beati?

excepto, quòd in Nasidieni appellatione semper iste postremus vltra priorem illam, quæ Cæsura concinnat, *περὶ ἡμῶν*, vnius syllabæ tractu excurrens, tantum non cerebrum asperitate sua excutiat mihi. Quid credam? an Horatium fortasse Aduerbij istius (vt, inquit) iterata repetitione erotematis sui inluauitatem ac duriciam emollisse, hoc modo?

Vt te Nasidieni, vt inuit cœna beati?

Quæ iteratio, præter auctam sententiæ energiam, quantum Sectioni isti Hexametæ venustatis adiiciat insuper, eos haud difficulter sagitturos confido;

Quot-

Quotquot Horati Artem, ac numerorum pondera callent

Legitimumq³ sonum digitis expendere, & aure.

Neque verò Despauterius audiendus, nō aliam, quàm ipsius huiusce Horatiani Hexametri auctoritatem, pro exemplo carminis omni incisione expertis, inante positam obiectare haud verius nobis. Et cautius mehercules, circūspectiusque Priscianus ille, qui in omni fere versuum genere Cæsurae observationem necessariam esse, Musarum candidatis inculcat. Quam qui infitæ rusticitatis vitio aut incuriosè neglectam, aut præ fastidio contemptam habet, is verò qua ratione in legitimis numerorum Censoribus, exactoribusque nomen porro suum profiteri possit, nō video: non magis sanè, quàm si quis in compositorius corporis motibus *terripavium*, id est, *tripudium facere*; neque vlla *staticulorum* mensura observata, psallendi saltandiue scientiam ac disciplinam aliis præscribere porro, ac præmonstrare postulet sese. Quod enim in Poëtica di metriendorum versuum ratione Incisio seu Percussio; Moduli in Musica; id ipsum in choreis ac tripudiandi arte Staticuli, hoc est, saltatorij gestus, ad quos Salisubuli nostri, tanquam ad Cæsuras, vel statos nescio quos concentus Musicos, artificii pede

Tellurem

Tellurem in numerum, perq̃, interualla ferire:
neque vel tantillum ab organici modi præcen-
tione discedere, cautū ac solenne habent etiam-
num hodie.

Epistola iv. libri primoris Albio Tibullo,
censu non minus, ac Natalibus; quàm Poëti-
cæ artis gloria inclyto atque insigni, inscripta le-
gitur. quem qui ab Elegiographo illo, qui ho-
die in manibus nobis, diuersum faciunt; eos &
secum prorsus, & cum Fastorum rationibus pu-
gnare, noua nuperaque Præcidaneorum nostro-
rum (Albiani honoris gratia) expressa à Plan-
tino publicitus Editione, fidem Lectori abundè
nos fecisse arbitramur. Nunc igitur satis superq̃;
habitura, si Poëtam illum

*Magistro Amore, hoc est, Erotico atatis
Feruentis aestu, an comitate Natura?
(Vena vberis quam Profluentiam, nostri
Perhibent, nouella ex Lege, Litteratores)
Operam Celocem, haud Corbitam locauisse
Nemesei, Neara, Deliaq̃, dicamus.
Magisq̃ sponte, & impetu ingeni quodam
Exuberantis, quàm laboris insani
Contentione, noctibusq̃, per iugem
Insomniam actis, lima & arte morosa,
Animum ad Poëtandum appulisse monstremus.*
id

id quod haud reapse modò, hoc est, ex ipsissimis
illis Tibulli Elegiis etiamnum superstitibus

(*Scriptis non nimium laboriosè,*

neque tam anxia euigilatæ compositionis stru-
ctura, aut operosæ expolitionis artificio atque
industria edolaris, quàm rara quadam Genij atq;
ingenij felicitate,

Morosa sine cogitatione, Poeticoque fu-
rore ac velut entusiasmo effusis) verùm hercu-
le ex hoc ipso quoque Horatij testimonio (qui
Censorem istum suum, Poëtam tantum non ex-
temporalem facere videtur) meridiana luce cla-
rius illustriusque compâret. quippe cuius scripta
Cassij illius Parmensis opusculis componere, imò
anteferre non dubitauerit. si tamen Parmensis
iste, idem cum altero Cassio illo, Hetrusco dico;
cuius subitæ, ne dicam tumultuariæ scriptioni
lutulentam illam (vt ipsi quidem placet) nimis-
que in composito pede fluitantem Lucillianam
Poësim in Sermonibus suis contenderat iam an-
tea, Satyrica huiuscemodi irrisione :

At si quis pedibus quid claudere senis,

Hoc tantum contentus : amet scripsisse ducentos

Ante cibum versus, totidem coenatus, Etrusci

Quale fuit Cassi rapido ferventius amni

Ingenium,

*Ingenium, capsis quem fama est esse, libriſq̃
Ambuſtum proprijs, &c.*

Vtut eſt, ijs certè aſſentari, aut ſecundas agere non placet, qui verba hæcce Horatiana:

*Scribere, quod Caſſi Parmenſis opuſcula
vincat:*

Ironiçôs in Tibullum detorta, ſibi potius, quàm nobis approbauere; perſuaſi ſcilicet, à Satyrico immodicâ iſtam in Poëſi Albiana, ac ſuperfluentem venæ luxuriem tacitè atque ex obliquo notari; quum eum pſe tamen (Sodalem, an Collegam dicam, nescio) ob promptam & expeditam communis Muſici ſtudij facilitatem, celereſque torrentis ingenij motus, palam atque ex directo laudare videatur. Nam tamenſi haud ignorem, quantoperè præcipitantiam iſtam, ac concitatum ſcribendi genus inuiſum Flaccus noſter, atque odioſum habuerit ſibi; non idcirco tamen uſque eò maledicentię proueſtum, tamque effuſas nigræ loliginis ſucco habenas laxaſſe crediderim, ut quem, *Candidum Sermonum ſuorum iudicem*, clarè nobis deprædicauerit modò; eundem immutata de ſubito voluntate, encomijsque in opprobriũ verſis, mox Cynico felle oblitum, collutulet porro atque dehoneſtet: *aquam frigidam ſuffundens ſubdole*, & (quod non minus utique Plautiſſat)

Lapidem

Lapidem altera ferens manu, panem ostendet altera.

Quo malignitatis, imò perfidiæ vitio, nihil animo liberali indignius, nihil hominis amici officio alienius minùsue consentaneum. & vindicandus ab huiusmodi calumniæ nota, me vindice atque assertore, Horatius in posterum.

Quod superest, initio Artis Poëticæ, vbi scribitur: *Et varias inducere plumas,*

Vndique collatis membris, &c.

post *Plumas*, inducendum videtur comma: *ut, Pluma membris vndique collatis*, superinducantur scilicet. *Quæ* quidem (*Membra* inquit) non auferendi, verùm herculè dandi casu posita accipere capior, cōtra mentem Interpretū quantum est Horatianorum.

Vnum video etiamnum restare curriculum mihi, quò de mendis nonnullis atque erratis scilicet, in priore illa Commentarioli nostri Editione per operarum, (ut fit) an exscriptorum? incuriam, siue incogitantiam humanitus admissis, sub miscellæ huius Appendicis finem obiter Lēctorem commoneam meum; de *Exordio* præsertim, item *Cordato*: quorum alterum pagina 65. linea 25. pro *Exodio*, alterum verò pag. 71. versu 15. pro *Cordato* Plautino illo

L. Hegionis

illo Hegionis liberto subditicium nobis pol im-
 meritisissimis obiectum . Nam cætera putidum
 sit iterare , τὸ *Perrecta* , ἀντὶ τῆς *Peruecta* , in
 ipsa operis Præfatione suppositum . Item ver-
 bum *Inducit* , linea 8. paginæ 31. non capi-
 te sed cauda , hoc est, postrema sui parte , nem-
 pe T. littera perperam diminutum . *Offundere*
 denique Infinitivum induci oportere , quod in
 locum præteriti pluralis *Offudêre* inquam, ver-
 sui 14. pagellæ antepenultimæ obhæsisse , do-
 leo quæ ac maceror. Adde supradictis pagina 63.
 linea 16. *Intelligentur* , exturbandum foras;
 eiusque vicem *Intelligamus* substituendum pro-
 tinus . & alia monetæ tritioris : quæ, quia con-
 suetudine leuia videntur , pro nihilo habenda:
 neque eorum causa mortalium cuiquam , qui
 sensu quidem vtatur communi, aures peruellent-
 dæ. quippe quæ per se quisque absque manu-
 ductoris opera , aut subsidio vlllo persequi vestigiis
 porrò,

Ac deprensa facul sollerti indagine Lector

Ipse suis possit eruere è latebris.

è quo numero fuerint & ista : *Doceri* , pro *Doce-
 re* pag. 8. lin. 8. in versu Horatiano; *Varrone* con-
 trà pag. 60. versu 10. pro *Varroni* publicatum.
 postremò *Illo*, pro *Illi* pag. 70. linea 8. *Aceruam*
 item

item pag. 78. versu 21. in exemplo Martialis,
vbi *Acerram* imprimendum fuerat. Hæc vole-
bam nescius ne esses. Aue; mi Lector, nec fa-
uentiam nega, *Quisquis eris, cuiatis eris*: vt
quidem Enniana clausula hocce tandem opu-
sculum explicemus.

FINIS.

ANTVERPIÆ EXCVDEBAT
CHRISTOPHORVS PLAN-
TINVS, ANNO CIO. 15.
LXXXII. XVI. KAL MART.